

EDIMEK ÑWAN NDỌ

Genesis 24:1-33

QYQHỌ UKPEP-ÑKPỌ 12

Eke Mkp̄arawa

IKỌ IBUOT: “Koro enye ọfiokde usuñ eke odude ye ami” (Job 23:10).

Abraham Ye Isaac

Okoto ke ñkopuyo Abraham, Abasi ọkọñwoñọ ọnọ enye ndibe ke ubon esie nnam kpukpru mme idut ererimbot ekop inemesit. Abraham idahaemi ekedi owo isua ikie ye aba; ñwan esie, Sarah ama onyũ akpa; ndien eyen mmọ, Isaac, ekedi ñkpọ nte owo isua aba. Abasi ama ọdiọñ Abraham, onyũ ọnọ enye ediwak udim erọñ ye enañ, ye gold ye silver, ye nditọ-ufọk-iren ye nditọ-ufọk-iban, mme camel ye mme ass. Isaac ekedi adia-akpa ofuri ñkpọ emi. Abraham ama enyene eti asaña-utom kiet ke ufọk esie, emi ekedide etubom ọnọ kpukpru nditọ ufọk eken, emi inimde ke akpanikọ ite ke ekedi Eliezer owo Damascus.

Ata Akpan Utom

Usen kiet Abraham ama okot eyen-ufọk emi enye okodomode onyũ ọfiokde ete ke edi anam akpanikọ, onyũ ọdọñ enye ata akpan utom ndinam. “Afo eyeka ke isọñ oro ñkotode, ye idut emana mi, akada ñwan ọnọ Isaac eyen mi.” Ke ini oro ekedi mme ete ye eka nditọ ekesimek ñwan, mme ebe ndọ enọ nditọ mmọ, kpa nte ndusuk idut esuk enamde mfin emi.

Emi ekedi ata ọkpọsọñ utom ọnọ eyen-ufọk emi. Ndusuk eyen-añwan emi idinyimeke ndikpọñ mbon ufọk esie ye mme ufan, ndika utọ anyan isañ oro. Edi ete-ufọk ama ọsọñọ etiñ ye enye ete “Jehovah Abasi enyọñ. . . . eyedọñ angel esie ebem fi iso.” Abraham ekefehe ndik ete, edieke eyen imọ edidọde ñwan oto ubon Canaan, ke eyenam enye awaha ọkpọñ usun, onyũ etre ndikpono ata Abasi.

Ndidianare Ñkpọñ Ererimbot

Mmọ emi etienede Jesus, emi ema ekedianare ekpọñ ererimbot, edi mmọ emi edide kiet ye Abasi ye Christ. Abasi ama ọdọñ Edisana Spirit Esie edi ke ererimbot etiene “oruk” Esie, man akada Ñwan ọnọ Eyen Esie, Jesus Christ. Mmọ emi edidide Ñwan-Ndọ Christ edi mmọ emi ema ekefen ke mme idiok-ñkpọ mmọ, eyet mmọ esana ofuri ofuri, mmọ enyũ eka iso ebọñ akam enyene Baptism Edisana Spirit. Mbon ererimbot enyene esisit nduk ye ata nditọ Abasi. Mmọ imaha ñkpọ ukem-ukem; mmọ ikaha ebiet kiet; mmọ inyũ iyomke nsaña ke otu kiet eken. Kot 2 Ñwed Corinth 6:14-18; man otim ọfiok edidianare nda owo Abasi ñkpọñ idiok nduk ye mmọ emi minimke ke akpanikọ.

Etọñọ Isañ

Eliezer ikabiatke ini ke nditim idem ndidaha isañ esie, sia anade enye asaña ebe ke akpa-utatan. Akamba-enañ-mbiomo (Camel) duop emi ekebiomde ekese udia ekedu ke isañ emi; mme enọ emi esọñde urua ema edu ke otu mbiomo oro. Ke ema eketim kpukpru ñkpọ ema, Eliezer ye ikọt esie edaha isañ.

Ke Mben Obube Mmọñ

Ke akpatre, mmọ ema ekessim utit isañ emi okoyomde usuñ ñkpọ nte itiat; ikie ition. Ke mmemidem ye nsatitọñ, ke ini mbubreyo mme akamba-enañ mbiomo duop enuhọ ke mben obube mmọñ emi odude ke edem obio Nahor ke isọñ Mesopotamia. Okposuk edi ekedide mbubreyo, edi eti eyen ufọk emi ekeyire ndikure utom esie mbemiso eyo okut. Mme obube mmọñ ekesidi mme ebiet emi mme owo ekesisobode ye mme ñkaiferi ke mbubreyo, sia mmọ ekesikade mmọñ ke utọ ini oro.

Edisana Spirit

Se Abraham akanamde, emi ikopde mi, etie nte emi Abasi Ete ọdọñde Edisana Spirit ete oyom Ñwan ọnọ Eyen Esie Jesus Christ. Idahaemi, nte edide mbubreyo ọnọ akani ererimbot emi, Spirit ke oyoyom Ñwan Ndo mbemiso eyo okut. Ekpri ini esisit, Spirit eyetre ndikot, ndien Ñwan Ndọ eyebe oduk ke Usọrọ Ndọ Eyen-Erọñ. (Se Qyqho Ukpep-Ñkpọ 342, Eke Mkp̄arawa, Qyqho Ñwed 27).

Akam Ye Ibọrọ

Nte nnyin ikemeke ndikut Eliezer nte ɔnuhɔde ɔbɔn akam ke ɔkpɔsɔn uyo ete: “Jehovah Abasi ete mi Abraham. . . . Sese, ami mmɔn nda ke mben idim mmɔn, ndien ama edi eyen añwan emi ndidɔhɔde enye nte, biomore abañ fo, mbɔk man nñwɔn; emi edinyuñ ɔdɔhɔde, ete, nñwɔn ndien nyenɔ mme akamba enañ-mbiomo fo mmɔn eñwɔn nko, yak edi enye ke afo enim ɔnɔ eyen fo Isaac: ndien ke ntre ke ndifiɔk nte afo ɔmɔfɔn ido ye ete mi.” Enye okoyom idiɔnɔ man otim ofiɔk ete ke Abasi ke adada imɔ usuñ ke ediyom nwan nɔ eyen ete-ufɔk esie.

Mbemiso enye okokure akam, ediye eyen-añwan edi ke obube mmɔn ye abañ ke afara esie. Edɔhɔ ete ke obio Mesopotamia ke ekesibiom abañ ke afara, ke ini mme obio efen ekesibiomde ke ibuot. Enye ama ɔsuhɔre aka ke obube mmɔn okokoi mmɔn. Eyen ufɔk efehe etiene enye, onyuñ ebeñe ete ɔnɔ imɔ mmɔn ke abañ esie inwɔn. Ndisuk nsat-itɔn esie ikedighe akpan nkpɔ inɔ enye, nte ndifiɔk mme eyen añwan emi akam edi ibɔrɔ akam imɔ. Enye obiomore abañ esie usɔp-usɔp onyuñ ɔnɔ enye mmɔn ɔñwɔn. Enye ikebeñeke mmɔn inɔ mme akamba-enañ-mbiomo esie, edi eyen-añwan ke ima esit esie onyime ndikoi mmɔn nɔ mme akamba-enañ-mbiomo esie eñwɔn nko. Enye ama okoi ediwak abañ mmɔn ke adiana ke adiana ɔnɔ mme akamba-enañ-mbiomo duop emi itɔn akasatde mmɔ eti-eti eñwɔn, tutu mmɔ etim eyuhɔ. Akamba-enañ-mbiomo enyene itie ke idibi esie emi ekemede ndikama ediwak mmɔn emi ekemede ndida enye nkpɔ nte usen duop mme osimde efut.

“Enye Emi ɔbɔn Odiɔnde”

Ke mkpa-idem ye inemesit, eyen ufɔk oro ada mkpanuen utɔn o-gold ye nkpɔ itɔnubɔk o-gold iba ɔnɔ enye, onyuñ ɔdɔhɔ ete, “Afo edi eyen anie? tiñ nɔ mi, mbɔk. Nte ebiet eke nnyin idañde mmɔdo ke ufɔk usɔ?” Enye ɔsɔsɔp ɔbɔrɔ ete, ke itie do ɔnɔ ikɔt esie ye mme ufene esie nde. Ini kiet enye adaha ɔnyɔn ufɔk man eketiñ utibe nkpɔ emi okotibede ɔnɔ mbon ufɔk esie. Eyen eka esie, Laban, adaha ini kiet nko aka ke mben obube mmɔn, ɔkɔdɔhɔ Eliezer ete, ke ima itim itie inim inɔ enye ye mme ufene esie. Ndien enye ɔdɔhɔ ete: “Afo emi Jehovah ɔdiɔnde, di.”

Ufañ Ke Isɔn Esit

Spirit ke oyoyom fi ete otim itie ke esit fo ebeñe editɔnɔ ntak ndi ɔbɔn. Enye oyom fi ebeñe idem ndidi kiet ke otu Nwan-Ndɔ Christ. Nte afo ke afafaña ikot emi? Mme afo emekeme ndidɔhɔ ete “Di; Ke didie ke afo ada ke edem obio? Ami mmotim itie ke esit mi nɔ fi?”

MME MBUME

- 1 Nso ikanam Abraham oyom Isaac ɔdɔ nwan ke otu iman esie?
- 2 Anie ekedi ibuot ke kpukpru se Abraham ekenyenede? Nte enye ekedi owo akpanikɔ?
- 3 Eyen-ufɔk emi akasaña didie ebe akpa-utatan?
- 4 Nso utɔ akam ke enye ɔkɔbɔn?
- 5 Enye akanam didie ɔfiɔk ete ke ebɔrɔ akam imɔ?
- 6 Tiñ mme edu uwem Rebekah.
- 7 Anie ke eda Eliezer edomo? Ke nso utɔ usuñ?
- 8 Tiñ mme ndusuk nwɔrɔnda-idaha Nwan-Ndɔ Christ.
- 9 Nte ema edara eyen-ufɔk emi ke ufɔk emi Rebekah okotode? Nso ke ekenam enɔ enye?